

অপ্রকাশিত গল্প

# চার বুড়োর আড্ডা

আশাপূর্ণা দেবী

সকাল থেকে আকাশ থমথমে মেঘলা, বিকেল হতেই বিরঝিরে বৃষ্টি শুরু হয়ে গেল। দেখে মজিলপুরের বিখ্যাত 'চার বুড়োর আড্ডা'-র তিন বুড়ো হরিহর, গদাধর আর মুকুন্দ ছটফটিয়ে উঠল, "সেরেছে! বুনাটা আসতে পারলে হয়!"

মুকুন্দ এরই মধ্যেই তাদের প্যাকেটটা বার করে অকারণ ভাঁজছিল, হঠাৎ জোর গলায় বলে উঠল, "না, না, আসবে



ঠিকই! আড্ডায় আসেনি, এমন কোনওদিন হয়েছে?”

হরিহর বলল, “হয়নি! সেটা আজম্বাকাল গায়ে-গায়ে থাকার জন্যে! চারজনই দুমিনিটের রাস্তায়। বুনোটোর যে বুড়ো বয়সে মতিভ্রম ঘটল। এই শেষ বয়েসে কিনা স্বশ্রববাড়ির সম্পত্তি পেয়ে, সাতপুরুষের বাড়িঘর ছেড়ে ঠেলে গিয়ে সেখান সামলাতে গেল। এখান থেকে ক’মাইল রে গদা?”

“এখন তো আর মাইল বলে না রে। কিলোমিটার-ফিটার কী যেন বলে।”

“থাম তো! এখন কী বলে তা নিয়ে তোর কী দরকার? তোর যা জানা তাই বল।”

“তা সেটা কত আর? আধমাইলটাক। বুনোর কাছে তো নসি। তবে কাল যেন বলছিল, ক’দিন থেকে হাট্টা বড় জ্বালাচ্ছে। ব্যাথা, যন্ত্রণা।”

“তাই যখন, তখন একটু সময় থাকতে বেরিয়ে পড়লেই হত! সকাল থেকেই তো আকাশের অবস্থা দেখছিস! কী এত রাজকার্য তোর!”

“এমনভাবে বলে, যেন সামনেই রয়েছে ‘বুদ্ধ’ বনমালী!”

গদাধর বলল, “তা বুনোর তো নিজের বাড়ি ছেড়ে স্বশ্রববাড়ি গিয়ে বাস করতে যাওয়ার মন ছিল না। বউ ছেলেমেয়েকে বলেছিল, ‘তোমরা গিয়ে থাকো গে, আমি এখানে বেশ থাকব। দূর তো বেশি না, দুপুরের দিকে গিয়ে না হয় ভাতটা খেয়ে আসব। রাতে তো খাদ্য খই-দুধ, সে এখানে ব্যবস্থা হয়ে যাবে। দক্ষর মা রয়েছে। চারদিকে এত বন্ধুবান্ধব, পাড়াপড়শি!’ তো বউ ছেলেরা রাজি হল? বলল, ‘পাগলের মতো কথা বোলো না!’”

“ওই সম্পত্তিটা পাওয়াই কাল হল।”

“আহা! এদিকে ছেলেমেয়ে তো আহ্লাদে উর্ধ্ববাহু হয়ে নেচেছিল! তাদের তো হাল ফিরে গেল। বুনোর শাশুড়ি-বুড়ির তো কম ঐশ্বর্য ছিল না! জমিজমা, বাগান, মাছের পুকুর, গোয়ালে গোয়ালভরা গোরু, উঠানে গোলাভরা ধান! তায় আবার সে-বাড়ির কাছাকাছি সিনেমা হল!”

মুকুন্দ তাসটা জোরে-জোরে ভাঁজ করতে-করতে বেজার মুখে বলে, “বুনোর আর ওর কোনটা কাজে লাগবে? পেটরোগা মানুষ! রাতে তো খায় এক ছটাক দুধে একটু খই ভিজিয়ে, আর দিনে একটু শিঙিমাছের ঝোল আর গলা-গলা

ভাত।”

“সে-কথা কে বুঝছে? বয়েস হলেই পরাধীন। একদা ওই বুনো যখন রেল আপিসে কাজ করত? ছুটিছাটায় বাড়ি এলে গুস্তিসুদ্ধ সবাই থরহরিকম্প।”

মুকুন্দ বলল, “এখন সকলেরই এক অবস্থা।”

গদাই বলে ওঠে, “তুই আর বলিসনে। তোর না আছে বউ-ছেলে, না আছে সংসার। পিসিমার যাওয়া পর্যন্ত তো মুক্ত পুরুষ। তা পিসিই কি কম দিন গেছে? পিসির মেয়েটাই গিমি হয়ে উঠল।”

কথাটা ঠিক! মুকুন্দ ঝাড়া হাত-পা। কোনও একসময় সেও চাকরি-বাকরি করত, তবে মজিলপুর থেকে কলকাতায় ডেলি প্যাসেঞ্জারি এমন কিছু ব্যাপার ছিল না! তা যাকগে, সেসব গত কথা!

মুকুন্দ বরাবরই রীতিমত স্বাধীন! পিসি থাকতেও। পিসি ছিল ভাল মানুষের রাজা! তো পিসির মেয়েটার সঙ্গে মুকুন্দ পাড়াতেই তার এক জ্ঞাতিভাইয়ের ভাইপোর সঙ্গে বিয়ে দিয়েছে। সেখানেই দুপুরে খাওয়াদাওয়া করে আসে। আর সারাদিনের চা, জলখাবার, আড্ডায় মুড়ি-তেলেভাজা, রান্ধিরে দু’খানা রুটি আর এক থাবা তরকারি পিসির মেয়ে বা ভাই-বউ নিজে এসে-এসে সাপ্লাই করে যায়।

হরিহর আর গদাধরের অবশ্য মস্ত একখানা করে সংসার। ছেলে, বউ, নাতি-নাতনি, গিমি! তা তাতে তার নিয়মিত সময় আড্ডায় হাজরে দেওয়ায় কোনও বিঘ্ন ঘটে না।

বড় সুখেই কাটায় এই চার বুড়ো!

আজন্মের বন্ধু!

ছেলেবেলায় ইস্কুল পালিয়ে পরের বাগানের ফলপাকুড় চুরি করতে, আরও একটু বড় হলে পরের পুকুরের মাছ ধরতে, একেবারে একাশ্বা। পাড়ার লোক বলত, “দুজোড়া মানিকজোড়!”

এখন ক্ষমতা গেছে। তবু সারাটা দিন খেয়ে, শুয়ে, বসে, দাঁড়িয়ে কাটিয়ে, হটফট করতে থাকে এই সঙ্কেবোলার তাসের আড্ডার জন্য! যেই চারজনে এক হল, যেন কী এক পরম পাওয়া পেল!

তা বনমালী অন্য পাড়ায় চলে গিয়েই যে আড্ডায় ঘাটতি ঘটেছে তা নয়। পৃথিবী উলটে গেলেও— ঠিকই যথাসময়ে এসে হাজির হয়!

আজই একটু যেন দেরি হচ্ছে!

কাজেই বাকি তিনজনে বলে চলেছে, “চিরদিনের হাড়-মুখ্য! আকাশটা তো

দেখছিস সকাল থেকে? দু’ঘণ্টা আগে বেরোলেই বা কী হত?”

এদিকে বৃষ্টিটা যেন একটু জোরেই এসে গেল।

নাঃ! মাটি করেছে!

তিন বুড়োই ফরাসপাতা ফোঁজি ছেড়ে বাইরের দরজার কাছে এসে দাঁড়াল। উদ্বিগ্ন মুখ। উৎকণ্ঠ দৃষ্টি।

হঠাৎ টেঁচিয়ে উঠল হরিহর, “ওই তো, ওই তো আসছে! হুঁ বাবা। বলেছি না, পৃথিবী উলটে গেলেও, আসা রদ হবে না!”

কিন্তু কী আশ্চর্য!

ছাতা মাথায় নেই কেন?

খালি মাথায় ভিজতে-ভিজতে আসছে!

মুকুন্দ তাড়াতাড়ি নিজের ছাতাটা নিয়ে, নিজের মাথায় দিয়েই এগিয়ে গেল।

সেকেলে টাউস মার্কা ছাতা! দু’জনের মাথা অনায়াসেই ঢাকা পড়তে পারে!

একজন আসছে।

অপরজন যাচ্ছে।

মাঝখানেই দেখা!

ভিজে চুপচুপে বনমালী বলে ওঠে, “আঃ, তুই আবার কেন কষ্ট করে? যা ভেজবার, তা তো ভিজেইছি!”

“তা হোক। চোখে দেখে স্থির হয়ে থাকা যায়; কিন্তু ছাতা নিয়ে বেরোসনি কী বলে?”

বনমালী কেমন একরকম বোকাটে হাসি হেসে বলে, “বেরিয়েছিলাম! নাতনি তার শৌখিন ছাতাখানা দিল হাতে। হঠাৎ সেই হালকা ছাতাখানা ঝোড়ো হাওয়ায় হাত ফসকে উড়ে গিয়ে ঘোষের পুকুরে গিয়ে পড়ল! ঢের চেষ্টা করলাম, হল না।”

বলতে বলতে এসে পড়ে।

বাকি দু’জন হইহই করে ওঠে, “এসে গেছে। এসে গেছে।”

মুকুন্দ বলে, “আহা, এখন ভিজে জামাকাপড় ছেড়ে, গা-মাথা মুছে আমার শুকনো কিছু জামা-কাপড় পরে তবে গুছিয়ে বোস!”

বনমালী তাড়াতাড়ি বলে, “না, না! বেশ আছি। গায়ে-গায়ে শুকিয়ে যাবে!”

“গায়ে-গায়ে শুকিয়ে যাবে? বলিস কী? ভিজে টুসটুস করছিস! কেন, আপত্তি কিম্বের?”

বনমালী আবারও তেমনই বোকাটে হাসি হেসে (এটা ওর মুদ্রাদোষ) বলে, “কে আবার তোর জামা-কাপড় ফেরত

দিতে আসবে ?

“কেন ? তুইই আসবি। কাল কি আর এত বিষ্টি পড়বে ? তোরটা কাচিয়ে শুকিয়ে রাখব, আমারটা দিয়ে যাবি, তোরটা নিয়ে যাবি। প্রবলেমটা কোথায় ?”

“তাই বলছিস ? আসলে কী জানিস, আচ্ছা দিচ্ছিস দে, নাতনির ছাতাটা গেল।”

বনমালী একখানা গামছা আর মুকুন্দর একখানা শুকনো ধুতি-গোঞ্জি আর হাফ পাঞ্জাবি হাতে নিয়ে পাশের দালানটায় চলে গেল !

গদাধর আর হরিহর স্বস্তির নিশ্বাস ফেলে বলে, “যাক বাবা, শেষপর্যন্ত এল তা হলে ! ... দ্যাখ কাণ্ড ! এখন বিষ্টিটা ছেড়ে গেল !”

যাক ! এখন যেখানে যাই হোক অন্তত ঘণ্টাভিনেকের মতো তো নিশ্চিন্তি !

পৃথিবীতে তখন থাকবে শুধু এই একখানা ফরাসপাতা মস্ত ফৌজি চারটে গোম্মা-গোম্মা তাকিয়া, চারটে বুড়ো আর একজোড়া তাস !

বনমালী মুকুন্দর জামা-কাপড়ে সজ্জিত হয়ে চলে এসে গুছিয়ে বসতেই, গদাধর বলে ওঠে, “যাক বাবা, শেষ পর্যন্ত এলি ! ভাবনা ধরেছিল, বুঝিবা আজকের আড্ডাটা ফসকে গেল।”

“আজকেরটা ফসকাবে মানে ?”

বনমালী তার রূপোর নস্যির কৌটো থেকে একটিপ নস্যি নিয়ে নাকে গুঁজতে গিয়ে বলে, “এ হে হে ভিজ়ে গেছে—যাকগে। ভিজ়েই সই।”

হরিহর বলে উঠল, “নস্যির কৌটো তো তোর ট্যাকে গোঁজা থাকে। সেখান থেকে কৌটোর ভেতরের নস্যি ভিজ়ল কী করে ?”

বনমালী, ভিজ়ে নস্যির হাতটা তাকিয়ায় মুছে হেসে বলে, “ওই তো খুড়োর কলে পড়ে গিয়েই তো ... যাকগে, তাস সাজা ! আজ না এসে থাকতে পারা যেত ? কাল মুকুন্দ, আর তোর কাছে হেরে মরেছি না ? ... শেষ পিটে হঠাৎ রঙের টেকা তুরূপ মেরে ছক্কা দিয়ে বসলি ! আজ তার শোধ নিতে হবে না ?”

“আজও তা হলে একই পার্টনার ?”

“নিশ্চয় ! অ্যাঁই মুকুন্দ, ওখানে করছিস কী ?”

“কিছু না ! তোর ভিজ়ে জামা-কাপড়গুলো ঠেলে রাখছি ! কী

হল ? তাস দেওয়া হয়েছে ?”

“কখন !”

“রংটা কী হল ?”

“চিড়িতন। চিড়িতনের সাহেব !”

“সেরেছে ! চিড়িতন। ওটা আমার চিরকেলে অপয়া ! যাক দেখি কী হাত তাস ?”

এই চার-চারটে আশি বছরের বুড়ো কী এমন খানদানি খেলা নিয়ে মশগুল থাকে !

এমন কিছুই না ! সেই আদি-অন্তকালের ‘গাবু’ খেলা ! ছেলেবেলায় গরমের ছুটির দুপুরে পিসিমা, জেঠিমা, পাড়ার কাকিমাদের যে নিত্য তাসের আড্ডা বসত, সেইখানে কাছ ঘেঁষে বসে থেকে, আর মনপ্রাণ চোখ সব দিয়ে দেখে-দেখে যা শিখেছিল তাই চালিয়ে আসছে চিরকাল !

সেই সাবেকি—দুকুড়ি সাতের খেলা ! এতে এখনকার খেলার মতো একসঙ্গে দু’জোড়া তাস লাগে না, পয়সা নিয়ে বাজি ধরাধরি নেই, হারজিতের মধ্যে, অপর পক্ষের পিট-এর ওপর টেকা মেরে, কিংবা তুরূপ মেরে বেশি পিট বাগিয়ে দিতে যাওয়া।

“আর হারা মানে ?”

“ছক্কা-পঞ্জা খাওয়া !”

এখনকার ছেলেমেয়েরা এই জোলো-জোলো খেলা দেখে আর তারই জন্য বুড়ো চারটের হানফানি দেখে হাসে !

তা তাতে বয়েই গেল !

কে ওদের কথার ধার ধারে ?

এরা নিজেদের আনন্দের মশগুল !

কিন্তু ‘কালকের শোধ নেব’ বলে যতই তড়পাক, বনমালীর যেন আজ কেমন অনামনস্ক-অনামনস্ক ভাব ! ... বেশ দু-একবারে ভুলই করে বসল। তার পার্টনার মুকুন্দর কারসাজি আর বাহাদুরিতে অবশ্য সামলে গেল।

শেষপর্যন্ত অবশ্য জিতেই গেল বনমালীরা !

যাক বাবা ! বাঁচা গেল !

তাড়াতাড়ি উঠে পড়ে বনমালী।

চৌকি থেকে নেমে পড়ে বলে, “হেরো হয়ে মরতে হল না ! আচ্ছা—”

মুকুন্দ হাঁ-হাঁ করে ওঠে, “আরে, আরে, চলে যাচ্ছিস যে ? বিষ্টি ছেড়ে গেছে। এঙ্কুনি চা, মুড়ি, ফুলুরি চলে আসবে—”

“তোরা খাস।”

“কেন, তোর কী এত তাড়া ? গিন্নি

গঞ্জনা দেবে ?”

শুনে বনমালী জোর পায়ে হাঁটা দিতে দিতে হঠাৎ মুখ ফিরিয়ে বাঁধানো দাঁতে ঝিলিক মেরে হেসে ডান হাতের বুড়ো আঙুলটা নেড়ে বলে যায়, “সে গুড়ে বালি।”

“আরে, আরে, এই বুনা ! তোর নস্যির কৌটোটা যে পড়ে রইল।”

তা সে-কথা আর বনমালীর কান পর্যন্ত পৌঁছল না বোধ হয়, ফিরে তাকাল না ! হঠাৎ যেন অন্ধকারে মিশে গেল।

এরা তিনজন—হরিহর, গদাধর আর মুকুন্দ কিছুক্ষণ সেইদিকে তাকিয়ে থেকে বলাবলি করে, “বুনোটোর আজ যেন কেমন বেভাব, দেখলি না ?”

“তাই মনে হল। বাড়িতে বকাবকি হয়েছে বোধ হয়।”

“বাড়ির বকাবকিকে ও ভারী কেয়ার করে ! শরীরটাই বোধ হয় জুতসই নেই !”

“হতে পারে। তা আমরাও তা হলে এবার চলেই যাই।”

মুকুন্দ হাঁ-হাঁ করে ওঠে, “কেন ? তোদের এত কী তাড়া পড়ল ? এই তো সবে আটটা কুড়ি ! তোদের তো আর মাঠ ভেঙে এক মাইল পথ হাঁটতে হবে না। মুড়িটা এসে পড়বে হয়তো এখনই ...”

“মুড়ি ? বলছিস ? তা হলে বসেই যাই আর একটু ?”

“হ্যাঁ, হ্যাঁ ! ততক্ষণ না-হয় ‘গোলাম চোর’ খেলাই চালিয়ে যাওয়া যাবে ছেলেবেলার মতো।”

বলে হা-হা করে হেসে ওঠে !

অতএব আবার দরজা বন্ধ করে ফিরে এসে চৌকিতে বসা ! তাসের গোছা নিয়ে নাড়াচাড়া।

একটু পরেই দরজায় ধাক্কা পড়ল, যেন জোর তলাবে দুমদাম।

ওই এসে গেল মুড়ি-ফুলুরি ! এত ধাক্কাছে কেন ?

মুকুন্দ নেমে পড়ে এসে দরজাটা খুলেই প্রায় পাথর হয়ে গেল।

মুড়ি-বেগুনির বদলে এ আবার কী ?

সামনে গোটাআষ্টেক ছোকরা।

একজন একটা জ্বলন্ত হ্যারিকেন নিয়ে হাতে দোল খাওয়াচ্ছে !

“তোমরা কে বাবা ?”

“আমাদের চিনতে পারছেন না ?”

“না তো—ঠিক—”

“তা চিনবেন না। আমরা ও-পাড়ার। সিনেমা হল-এর পাশে থাকি আমরা। তো দাদুরা কি এখনও তাস





পেটাচ্ছেন নাকি ? অ্যাঁ ? আচ্ছা লোক তো ! চারজনের আড্ডার একজন যে আজ এল না, তার জন্যে প্রাণে একটু ধড়ফড়ানি আসেনি ?”

“এল না মানে ? বনমালীর কথা বলছ তো ?”

তিনজনেই উঠে এসে মারমুখি হয়ে বলে ওঠে, “এই তো তাস খেলা সেরে একটু আগে চলে গেল !”

“কী ? কী বলছেন দাদুরা ? একটু আগে তাস খেলে উঠে গেলেন বনমালী বাঁড়ুজ্যে ! হ্যা হ্যা হ্যা !... দাদুরা কি সন্ধেবেলাই আফিমের মৌতাতে ঝিমোন ?...লোকটা তো সেই কোন বিকেলবেলা ঘোষের পুকুরে ডুবে মরে, এখন পেট ফুলে বাড়ির উঠোনে শুয়ে ! ওঁর স্ত্রী কাঁদতে-কাঁদতে বললেন, আপনারা নাকি ওঁর চিরকালের প্রাণের বন্ধু, তাই একবার শেষ দেখা দেখতে—”

হরিহর, গদাধর আর মুকুন্দ তিনজনের কেউই ব্রাহ্মণ নয়, হলে চিৎকার করে পৈতে ছিড়ে অভিশাপ দিয়ে বসত। তবে শুধু চিৎকার করতে তো পৈতে লাগে না !

তিনজনে একসঙ্গে গর্জন করে ওঠে, “কী ? আমরা অফিমের ঝোঁকে ?

অসভ্য, বেয়াদপ ইয়ার ছোকরারা ! নিজেরা নেশার ঝোঁকে এসে যা মুখে আসছে বলে চলেছ ? ...ইয়াকি মারবার আর বিষয় পাওনি ? একটা জলজ্যাস্ত বৃদ্ধ ব্রাহ্মণ, তাকে মেরে পেট ফুলিয়ে উঠোনে শুইয়ে রেখে, ছি ছি। নরকেও ঠাই হবে না তোমাদের !”

“ওঃ, বটে নাকি ?”

আটজনের সমন্বয় প্রতিবাদ !

“তা হলে এই চললুম ! নেহাত আপনারদের খবরটা দিতে বললেন নবগোপালের ঠাকুমা, তাই আসা !... শেষ দেখা দেখতে ইচ্ছে হয় তো যান চটপট ! নইলে পুলিশে এক্ষুনি লাশ তুলে নিয়ে গিয়ে মর্গে চালান দিয়ে দেবে। অপঘাত মিত্য বলে কথা !”

নবগোপাল বনমালীর নাতি।

তিন বন্ধু হকচকিয়ে বলে, “ব্যাপারটা কী বল তো ?”

“কী আবার ? বদমাশ ছেলেদের বদমায়েশি। মজা করার এক নতুন ফন্দি !... আমরা ভয় পেয়ে ছুটতে-ছুটতে যাব, আর ওরা তখন দাঁত বার করে হাসবে !”

“তা হোক। তবু একবার যাওয়া

যাক !”

এখন তিনজনের তিন মত।

“গিয়ে কী হবে ? ওদের মজা করার হাসি দেখতে ?”

“কিন্তু এত সব বলল। যদি সত্যি মর্গে চালান দিয়ে বসে ! তা-হলে শেষ দেখাটা—”

“যদি মর্গে চালান দিয়ে বসে ? জলজ্যাস্ত লোকটাকে ! বলি নিজেদের চোখকে বিশ্বাস করব, না এই ফক্কড়দের কথা বিশ্বাস করব ?”

“সেও তো কথা ! নসিয়ার কৌটোটা তো এই চোখের সামনেই পড়ে থেকে চকচক করছে ! খাঁটি রূপোর জিনিস ! অফিসে রিটারার করার সময় ফেয়ারওয়েলে দিয়েছিল !”

কিন্তু নিজের চোখকে যে অবিশ্বাস করতে বাধ্য হতে হয়। অথবা অলৌকিক কোনও ভৌতিক কাণ্ডকে বিশ্বাস করতে হয় !

অথচ—ততক্ষণে প্যাড়ার লোকেরা মুকুন্দের দরজায় এসে ভেঙে পড়েছে।

“বামুনজ্যাঠার খবর শুনলেন ?”

“বামুনদাদুর খবর শুনলেন ?”

“নবুর ঠাকুদার খবর শুনলেন ?”

“কী কাণ্ড ! কী কাণ্ড ! হায় ! হায় !”

“শুনলাম, বাড়ির লোকের কথা না শুনে, ‘বিষ্টি আসছে বলে’ বেলা তিনটের সময় আপনাদের এই আড্ডায় আসছিলেন !... হঠাৎ যে কী করতে পুকুরধারে গেলেন !”

এই তিন বুড়ো, বিশেষ করে মুকুন্দ, গলার শির ফুলিয়ে, হাউমাউ করে চৈচিয়ে বলতে চেষ্টা করল, “কিন্তু আসল ব্যাপারটা তো...”

তা কে শোনে কার কথা ?

যে মানুষটাকে বেলা পাঁচটায় পুকুর থেকে টেনে তোলা হয়েছে এবং এখনও জল খেয়ে পেট জয়ঢাক করে বাড়ির উঠানে পড়ে আছে, সে লোক সঙ্গে সাড়ে ছ’টায় এঁদের সঙ্গে তাস খেলে গেছে, একথা কে বিশ্বাস করবে ?

সমবেতর রায় আসলে, ‘আসছে-আসছে’ করে ভাবতে-ভাবতে, ‘এল না’ দেখে বুড়োরা বাদলা হাওয়ার আমেজে ঘুমিয়ে পড়েছিল, আর সেই ঘোরের মধ্যে স্বপ্ন দেখেছে, ‘এসেছিল’—খেলে গেছে।”

“বেশ, তাই যদি হয় তো নসিয়ার কোটোটা ?”

“ও কিছু না। হয়তো কালকেই ফেলে গিয়েছিল, তাকিয়ার তলায় পড়ে ছিল।”

“বটে ! তাকিয়ার তলায় ? তাকিয়া রোজ ঝেড়েঝেড়ে তোলা হয় না ?... ঠিক আছে, তাই-ই যদি হয়, ওই ভিজে জামাকাপড়গুলো ? যেগুলো দালানের কোণে পড়ে রয়েছে ?”

দু’-একজন বাড়ির মধ্যে ঢুকে এসে উকিঝুঁকি মেরে দেখে মুকুন্দকে বলল, “ওসব বোধ হয় দাদু, আপনারই ! সকালে চানের সময় ছেড়েছিলেন, বাদলা দেখে। আপনার কাজের লোক বোধ হয় কাচেনি। ভেবেছে শুকাবে না তো। কেচে আর লাভ কী ? কাল কাচলেই হবে !”

মুকুন্দ রেগেমেগে সেই ভিজে সপসপে ধুতিখানা কুড়িয়ে নিয়ে এসে বলে ওঠে, “এই ধুতি আমার ? এই ঝুলপাড় বাবুধাক্কা দেওয়া ধুতি ? জন্মে এরকম শৌখিন ধুতি পরি আমি ? দেখেছে কেউ ? কেউই পরতাম না।

তো ইদানীং বুনার নকামার্কা নাতিটা শখ করে দাদুকে পয়লা বোশেখে, পূজোর সময় ওইরকম বাহারি ধুতি কিনে এনে উপহার দেয়, তাই।”

কিন্তু এতেও কারও তেমন মন

বদলাল বলে মনে হল না।

কোন বুড়ো কী পাড়-ধুতি পরে, সে আবার কে কবে তাকিয়ে দেখেছে ?

অকাটা আর প্রত্যক্ষ সত্য তো সেই জলে ডুবে মরা পেটফোলা লাশটা। যা নাকি সবাই স্পষ্ট চোখে দেখে এসেছে !

হঠাৎ পাড়ার ঠানদি গঙ্গাবুড়ি বলে ওঠে, “ওরে, শুনেছি, এমন হয় ! হঠাৎ ঘটলে—সদ্য মড়াটা, আপনজনদের একটু দেখা দিতে যায় !”

তা ‘একটু দেখা দিতে’ যেতে পারে। হয়তো ছায়া-ছায়া শরীর নিয়ে। কিন্তু তিন ঘণ্টা ধরে তাস পিটে যায় ? ... “এই মারলাম টেকা ! এই দিলাম তুরূপ !” বলে হুকার ছেড়ে যায় ? কার মড়া তুলে কার নাম করেছে !

মুকুন্দ বনমালীর সেই ছেড়ে রেখে যাওয়া ভিজে জামা-কাপড়গুলো গামছায় জড়িয়ে পুঁটলি বেঁধে হাতে ঝুলিয়ে হনহন করে এগোতে থাকে বনমালীর স্বশুরবাড়ির উদ্দেশ্যে !

এত জোরে হাঁটা অভ্যেস এখন আর নেই। কিন্তু রাগে, দুঃখে, অপমানে আর বিভ্রান্তিতে গায়ে পাগলা হাতির বল !

হরিহরের হাতে লণ্ঠন, সে হাঁক ছাড়ে, “এই মুকুন্দ। অত ছুটিছিন কেন ? আমি তাল দিতে পারছি না।”

তো তারপর ?

বনমালীর স্বশুরবাড়ির উঠানে তো সেই দৃশ্যই !

‘কার না কার মড়া’ বলার উপায় কোথা ? নাকের ওপরকার ওই মস্ত আঁচলটি ? এই মজিলপুর গ্রামে আশপাশে আর কারও ছিল অমন ?

আর ভিজে ধুতিখানা দেখেই তো বনমালীর গিঁনি ডুকরে উঠল, “ওগো, হ্যাঁগো ! এই কাপড়টা পরেই বেরিয়েছিল গো !... ওমা—এখন পরনে কী ? ছি ছি। এই সরু নরুনপাড় চটের মতন মোটা খেঁটে ধুতি সাতজন্মে পরেছেন তিনি কখনও ? ওগো সেই যে বলে ‘মরা’ মানে নতুন কাপড় পরা। এ তাই না কি ?... হায়। হায়। যাক্গে গিয়ে এইরকম কাপড় পরতে হবে তোমায় ?”

নিজের ধুতিখানা সম্পর্কে এমন তাক্কিল্য শুনে বিরক্ত হয়ে সরে এল মুকুন্দ।

এই সময় পুলিশের লোক এল।

বাজখাই গলায় প্রশ্ন, “কখন দেখা গিয়েছিল পুকুরে ভাসতে ?”

“আজ্ঞে, বেলা পাঁচটা নাগাদ।”

“কে প্রথম দেখেছিল ?”

“আজ্ঞে, এই যে এই রাখাল ছেলোটা। ওর একটা বাছুর হারিয়ে যাওয়ায় খুঁজে বেড়াতে-বেড়াতে চোখে পড়ে জলের মধ্যে কী দাপাদপি করছে। ... ভাবল বোধ হয় বাছুরটাই জল খেতে গিয়ে হড়কে পড়ে মরেছে। তা পুকুরে ঝাঁপিয়ে পড়ে তার একটা ঠ্যাং হাতে পেয়েছে বলে বিস্তর টানাটানি করল বোচারা, কিন্তু এই রোগাপটকা বছরদশেকের ছেলের সাধ্য কী বনমালীর ওই লাশ টেনে তোলার ?... তা ছাড়া দেখল যেটাকে বাছুরে ঠ্যাঙ ভেবেছিল, সেটা হচ্ছে বনমালীর পাঞ্জাবি পরা একখানা হাত ! তারপর আর কী ? চৌচামেচি করে পাড়াসুদ্ধ লোক জড়ো করে—”

“মাছধরা জেলেরা এসে টেনে তুলল।”

“দেখল, লোকটার অন্য হাতে একটা ফুলকাটা ছাতার বাঁট ধরা। ছাতার কাপড়টা জলে সুপসুপে ছেঁড়াখোঁড়া।”

“তার মানে টানাটানি করেছিল বুড়ো বিস্তর নাতির ছাতাটা বাঁচাতে !”

তারপর ?

তারপর আবার কী ? পুলিশ লাশটাকে মর্গে নিয়ে চলে গেল। যতই যা হোক, অপঘাতের মড়াকে মর্গে নিয়ে যেতেই হবে ! ফিরে ফিরে দেখে হিসেব করে বুঝতে হবে, সত্যিই নিজে অসাবধানে ডুবে গেছে ; না কেউ শত্রুতা করে জলে ঠেলে দিয়ে চুবিয়ে মেরেছে !

অনেক রাতে ফিরে এল তিন বুড়ো।

হরিহর আর গদাধর বলল, “আজ রাত্তিরে আর তোর একা বাড়িতে শুয়ে কাজ নেই মুকুন্দ, আমরা দু’জনা থাকি !”

“থাকবি, তা থাক !”

হাতের হারিকেনটার পলতে বাড়িয়ে দিয়ে, দরজার তালা খুলে ঘরে ঢুকে এল মুকুন্দ। পিছু-পিছু ওরা দু’জনও।

ঘরের দরজার শেকলটা খুলল !

আর খুলেই তিন-তিনটে আড়ে-দৈর্ঘ্যে প্রকাণ্ড লোক “আ—আ—আ” করে চৈচিয়ে উঠে সপাটে মাটিতে !

জ্ঞান হারাবার আগে দেখতে পেয়েছিল চৌকির ওপর নিজের তাকিয়া ঠেস দিয়ে বনমালী তাস ভাঁজছে। এদের দেখেই ঝিঝি করে হেসে উঠে ফ্যাসফেসে গলায় বলে উঠেছিল, “দুঃখ করিস না, আজ্ঞে ভাঙবে না। আসব রোজ।”

ছবি : দেবাশিস দেব